

Communicaziun a las medias dals 22 d'avrigl 2023

35avla radunanza dals participants da la BCG: resultat da record, cuntinuitad e fidanza

2'630 giasts èn sa radunads sonda en la Halla da la citad da Cuira per la 35avla radunanza da las participantas e dals participants da la Banca Chantunala Grischuna (BCG). Las investuras ed ils investurs han pudì sa legrar d'in resultat da record e d'ina dividenda da 42.50 francs per scrit da participaziun. Ultra da quai ha la BCG beneventà in nov commember da la direzziun: Pascal Pernet è dapi il 1. d'avrigl 2023 responsabel per l'unitad da fatschenta Martgads cun var 500 cussegliastras e cussegliastrs a Cuira ed en las regiuns. El è il successur da Thomas Roth che va en pensiun la fin da matg.

La BCG ha realisà l'onn da gestiun 2022 in gudogn dal concern da 207.5 milliuns francs. «Grazia a la cuntinuitad ed a la fidanza pudain nus – quintà enturn sin il dumber d'abitantas e d'abitants – distribuir per l'onn passà in import da passa 460 francs per chau», constatescha il president da banca Peter Fanconi. Il chantun Grischun e las participantas ed ils participants han profità da dividendas da totalmain 106.3 milliuns francs.

Il model da fatschenta sco factur-clav ed il svilup dal scrit da participaziun

La BCG ha diversifitgà consequentamain ses retgavs ils ultims onns. Ordaifer il chantun persequitescha ella vinavant quest model da fatschenta cumprovà, tranter auter cun sias participaziuns. En la sedia principala en il Grischun sa focussescha la banca er en il futur sin duas pitgas da retgav principalas, surtut sin la fatschenta da tschains classica e sin la fatschenta d'investiziuns e da provediment. Er il curs dal scrit da participaziun da la BCG è sa sviluppà a moda positiva durant ils ultims trais onns. El è restà ordvart stabil ed ha surpassà cun ina performance da 22.7 pertschient cleramain il SPI ed er il SPI Bancas, l'index da las bancas svizas.

In engaschi persistent en e per il Grischun

La BCG s'engascha per il Grischun sco spazi da lavurar e da viver. Cun ses fond da contribuziun sustegna ella per exempel divers projects sin il champ da la cultura, da la societad, dal sport e da l'economia. Engaschi mussa la banca era cun sias activitads per far frunt a la mancanza da personal qualifitgà e da forzas da lavur. Quella è particularmain gronda en ina regiun periferica sco il Grischun. La soluziun è da restar attractiva sco patruna e d'investir en la furmaziun e la digitalisaziun. La BCG ha perquai sviluppà ensemen cun la Scola auta spezialisada dal Grischun ina scolaziun cun certificat. Suenter ina fasa da pilot è quella uss averta per tut las interpresas e tut las lavurantas ed ils lavurants en il Grischun che vulan daventar fits per l'avegnir digital. «Ultra da quai essan nus en la banca amez la transfurmaziun per introducir novas estructuras da lavur», di il CEO Daniel Fust. Quellas prevesan ina flexibilisaziun dal temp e dal lieu da lavur e la pussaivladad da lavurar en estructuras da raits agilas. «La finamira da questas stentas è da posiziunar la BCG sco interpresa moderna e da mantegnair e gudagnar persunas cun bunas qualificaziuns qua en il chantun», explitgescha Fust.

In nov commember da la direenziun

Pascal Pernet è naschì il 1973 a Samedan e creschì si a Sent. Il 1. d'avrigl 2023 ha el surpiglià la direenziun da l'unitad da fatschenta Martgads suenter ina fasa d'introducziun da trais mais. L'unitad da fatschenta la pli gronda da la BCG cun var 500 collavuraturas e collavuratur è responsabla per la cussegliaziun cumplexsiva da tut ils segments da clientella en l'entir chantun. Ella cumpiglia diesch sedias regionalas ed ils trais champs strategics Clientella privata & ipotecas, Clientella da fatschenta e Private Banking. «Jau ma legrel da pudair gidar a sviluppar vinavant cun success la banca», declera Pernet. Il cussegl da banca e la direenziun giavischan ad el bler plaschair e satisfacziun cun la nova incumbensa.

Musica e daletgs culinaries

Il program è vegnì accumpagnà musicalmain da la furmaziun «Dai Kimoto & his Swing Kids» enconuschenta sin plaun internaziunal. Il musicist e cumponist Dai Kimoto da Romanshorn motivescha dapi passa 20 onns uffants e giuvenils da sunar en sia big band «Swing Kids». La furmaziun fundada il 2002 va dapi onns sin turnea tras la Svizra e l'entir mund. Avert la radunanza da las participantas e dals participants ha la musica instrumentala da la BCG sut la batgetta dal dirigent Hendri Riedi. Per la part culinaria èn stads responsabels Christoph Tobler e ses team.

Contact:

Thomas Müller, thom.mueller@gkb.ch, telefon +41 81 256 83 11

Banca Chantunala Grischuna, chascha postala, 7001 Cuira | medien@gkb.ch / gkb.ch/medien

Banca Chantunala Grischuna.

La Banca Chantunala Grischuna porscha tut quai ch'i dovra per ina banca universala moderna – per persunas privatas, l'economia ed il maun public. L'interpresa cun sedia principala a Cuira è represchentada en passa 40 lieus en il Grischun. Cun var 1'000 collavuraturas e collavuratur è la BCG ina da las pli grondas patronas en il chantun. Sia attaschadadad al Grischun exprima ella en moda multifara. Ultra da sias activitads economicas s'engascha ella cun ses sponsoradis, ses fond da contribuziuns e sias puschidas per lavur voluntara.

La BCG dispona da participaziuns da maioritad a la Banca privata Bellerive AG, a l'Albin Kistler AG ed a la BZ Bank Aktiengesellschaft e d'ina participaziun da minoritad a la Twelve Capital Holding AG. Il scrit da participaziun BCG è quotà a la bursa dapi il 1985.

Termins:

Rendaquint semestril 2023:

27 da fanadur 2023